

SOL DI PUEBLO

BRIYANDO FUERTE • TRECIENDO CLARIDAD

MACHINE DI BESTRALING DAÑA PA ALGUN SIMAN; MERVIN KICO TA PASANDO?



**SINDICATONAN
TA PIDI
PARLAMENTO
PA PONE UN
STOP NA E
RIJKSWET
HOFA!**



El a wordo condena na
26 luna di prison
**HOMBER CU TABATA
BENDE DROGA
HAYA CU ARMA
DI CANDELA Y
CANTIDAD DI BALA**

PIETERS DI FRACCION DI PPA TA BOGA PA RESCATA ESENCIA DI DEMOCRACIA Y EXIGI UN PARLAMENTO INDEPENDIENTE



Durante su rueda di prensa semanal, parlamentario Eduard Pieters di fraccion di PPA a lanta un critica extremadamente fuerte riba presidente di Parlamento, Marlon Sneek, despues cu e decision pa schors e reunion parlamentario cu minister Gerlien Croes a crea indignacion den oposicion. Pa Pieters, loke a pasa dialuna no tabata djis un decision di procedura, sino un muestra peligroso di con Parlamento di Aruba ta perde su independencia y cada biaha ta bira mas un instrumento pa proteha gobierno en bes di controla gobierno.

Ken presidente di Parlamento realmente ta sirbi?

Pieters a recorda cu

presidente di Parlamento tin un responsabilidad constitucional y moral pa eherce su funcion “naar eer y geweten”, manteniendo neutralidad, imparcialidad y respet pa Reglamento di Ordo.

Pero segun Pieters, loke a pasa den sala di Parlamento dialuna, tabata completamente contrario na esey. “Nos a pensa cu presidente finalmente lo para firme pa proteha Parlamento y pone presion riba minister pa contesta e preguntanan legitimamente,” Pieters a declara. “Pero den e momento cu reunion a cuminsa move den un direccion incomodo pa gobierno, presidente a opta pa corta e debate y schors e reunion ‘tot nadere order’.

Pa fraccion di PPA, esaki no

tabata un accion neutral, pero un accion politico pa proteha minister contra control parlamentario.

Democracia no por funciona cu un presidente sumiso

Den un tono particularmente duro, Pieters a acusa presidente Sneek di actua mas como defensor di gobierno en bes di defensor di Parlamento. “Unda nos ta bay como pais?” Pieters a cuestiona. “Ki tipo di democracia nos tin ora presidente di Parlamento ta bira actor principal den silencia debate y evita cu ta confronta minister cu e preguntanan serio?”

Segun Pieters, Parlamento tin un rol fundamental den un estado di derecho: controla gobierno, exige transparencia y obliga e ministernan pa responsabilisa nan maneho. Pero si presidente di Parlamento mes ta interveni pa stop e proceso, e sistema democratico mes ta wordo debilita.

“Asina nos democracia ta wordo secuestra pocopoco,” el a declara.

Parlamento a bira stempel di coalicion

Pieters tambe a expresa profundo decepcion cu loke el a experiencia durante su prome seis lunanan como parlamentario. Segun Pieters, coalicion constantemente ta muestra cu nan no ta wak

Parlamento como un poder independiente, pero como un mecanismo pa valida loke gobierno kier.

“Parlamento no por bira un stempel automatico di gabinete,” Pieters a bisa contundentemente.

El a critica cu presidente Sneek no a muestra independencia of “wes'i lomba” pa laga e reunion sigui su curso natural, insinuando cu presion politico externo tabata influyendo e decision pa schors e reunion.

“Ta parece cu ta djis un yamada of mensahe for di gobierno pa Parlamento ta cambia direccion den sala di Parlamento,” Pieters a declara.

“Si Parlamento no controla gobierno, democracia ta na peligro”

Pa fraccion di PPA, e incidente aki ta hopi mas cu un conflicto politico temporario. Segun Pieters, e ta un señal alarmante tocante e estado actual di nos institucionnan democratico.

“Parlamento mester ta e lugar, unda gobierno ta rindi cuenta, no un lugar unda gobierno ta wordo proteha,” el a conclui. “Ora presidente di Parlamento ta uza su posicion pa stop debate y evita cuestionamento, e ora nos no ta papia mas di liderazgo neutral, pero di un Parlamento cu ta perde su esencia democratico.”

Clasificados



SOLODIPUEBLO@GMAIL.COM

CEL. 585 9500



MACHINE DI BESTRALING DAÑA PA ALGUN SIMAN; MERVIN KICO TA PASANDO?

Oranjestad – Machine di bestraling na IMSAN ta for di servicio ya pa algun siman, loke a crea gran preocupacion entre pacientnan cu mester cuminsa of haya tratamento urgente. Hopi famia y pacient ta puntra con nan lo sigui reciبي e cuidu medico cu nan mester.

Diferente persona a expresa nan inquietud tocante e situacion, pasobra tratamentonan di bestraling ta importante pa pacientnan cu ta lucha contra cancer. Te ainda no tin claridad cuanto tempo e machine lo keda daña ni kico ta e plan exacto pa e pacientnan afecta.



**AUMENTO DI BIENTO TA TRECE
MAS STOF
Y MAS KEHONAN
DI ALERGIA**



Proteha bo salud.
Tuma precaucion.



**NISTERMENTO
FRECUENTE**



**WOWO IRITA
Y TA BASHA AWA**



**NANISHI
CERA**



**DIFICULTAD
PA HALA ROSEA**

Bo Salud, nos prioridad!

Pueblo kier sa:

Cuanto tempo lo tuma pa e machine bolbe funciona?

Ta existi un plan temporario pa sigui atende pacientnan?

Lo manda pacientnan pa Colombia of Corsou pa sigui cu nan tratamiento?

Minister di Salud, Mervin Wyatt-Ras, ta enfrenta preguntanan serio tocante e asunto, mientras famianan ta sperando pa informacion oficial y solucion rapido.

Comunidad ta spera cu gobierno y autoridadnan di salud lo duna claridad pronto pa evita cu situacion di pacientnan bira mas critico.



Noticia di Corte

El a wordo condena na 26 luna di prison **HOMBER CU TABATA BENDE DROGA HAYA CU ARMA DI CANDELA Y CANTIDAD DI BALA**

ORANJESTAD – Hues di Corte di Husticia a trata e caso penal cu Ministerio Publico a cuminsa contra e homber J.L.P. acusa di posesion di arma di candela y bende droga.

SOLO DI PUEBLO por a compronde cu Polis a haya cantidad di droga y un arma di candela cu cantidad di bala na cas di e acusado. Den Corte e acusado a bisa cu e ta usa marihuana den KIA.

DROGA Y ARMA HAYA

Recien tratamiento di e caso a tuma lugar caminda Fiscal a acusa J.L.P. cu entre December 2024 y December 2025 e tabata bende droga y cu entre 1 Juni 2024 y 2 December 2025 e tabatin un pistol Baretta y cantidad di bala 9 mm.

Segun J.L.P., el a cumpra e arma for di hende pa despues bende esaki. Pero despues el a pensa cu si e bende e arma lo bin problema. Pesey el a keda cu e arma. Hues a bisa cu na Polis, J.L.P. a bisa cu e arma tabata un “pronkstuk”. J.L.P. a bisa Hues cu e tabatin e arma warda y pesey e tabata considera e arma un pronkstuk.

Hues a puntra con hende ta bin ofrece arma na J.L.P. Segun J.L.P., e hendenan Venezolano for di kende e ta cumpra droga, a ofrece e arma. Fiscal a remarca cu anterior J.L.P. a wordo condena caba pa arma y tabata sa e consecucionan. Pakico e ta bolbe busca arma. J.L.P. a admiti cu el a haci malo.

BENDE DROGA

Hues a bisa cu tin indicacion cu J.L.P. tabata bende droga. Polis a detene un homber K. na un club nocturno, kende a bisa cu el a cumpra for di J.L.P. y a duna Polis e number di J.L.P. Asina Polis a cuminsa sigui whatsapp di J.L.P. caminda ta mira hende ta puntra: “si tin snow”, “si tin cheiba”, “si tin wheat”, “si tin white”.

Esaki a conduci na un investigacion na e cas unda J.L.P. ta biba. Esaki a sosode dia 2 December 2025, caminda Polis a haya 721gram di marihuana, 354,9 gram cocaina y balansa. Tur e droga tabata

den sakitonan. Polis tambe a haya den plafond di e cas scondi un arma di candela cu cantidad di bala. Hues a remarca cu normal esnan den droga, tin un arma di candela. Ademá tin un cantidad di testigo cu a bisa cu a cumpra droga for di J.L.P.

Tur e droganan ta muestra cu J.L.P. tabata bende droga. J.L.P. a admiti di tabata yuda hende cu droga. El a bisa cu e ta usa marihuana y cocaina. El a bisa cu tur su conocirnan ta usa droga y e ta comparti cu nan pero a yega momento cu e no tabata comparti mas y tabata bende. J.L.P. a bisa Hues cu for tempo cu e tabata chikito, e tabata usa marihuana. El a bisa Hues cu tabatin un periodo cu droga tabata poco na Aruba y hendenan tabata bay serca dje pa haya droga.

USA DROGA DEN KIA

Hues a remarca cu J.L.P. a yega di haya condena di 22 luna di prison pa droga y arma di candela y pakico J.L.P. ta bolbe haci'e. Hues a puntra si J.L.P. no a pensa kico e tabata haci. Segun J.L.P., e problema ta cu e ta keda usa droga. El a admiti di ta adicto. El a bisa cu den KIA e sa haya marihuana. Hues a bisa cu e ta increibel pero e ta aprecia cu J.L.P. ta papia e berdad. J.L.P. a bisa cu e ta adicto y kier rehabilita

FISCAL A EXIGI 30 LUNA DI PRISON

Fiscal a bisa cu e caso a cuminsa ora a detene e homber K. cu droga. K. a bisa cu el a cumpra droga for di J.L.P. Fiscal a sigui bisa cu investigacion a muestra cu e tabatin droga y Baretta cu 47 bala scondi den plafond. Desde 2024, J.L.P. tabatin e arma te December 2025 ora el a wordo deteni. Fiscal a bisa cu tin prueba cu dos vez na Januari 2025, J.L.P. a bende cocaina. Tambe J.L.P. a admiti di tabata bende marihuana.

Fiscal ta haya e caso serio. El a bisa cu droga ta causa hopi problema den comunidad. Tambe cu droga ta crea criminalidad. Fiscal a bisa cu e ta tene cuenta cu na 2021 a condena J.L.P. na 22 luna di prison pa e mesun cos. Fiscal a exige 30 luna di

prison pa J.L.P., di cual 6 luna ta condicional cu un tempo di prueba di 3 año. Fiscal ta haya cu J.L.P. mester di ayudo pa su adiccion di droga. Fiscal ta kere cu lo ta bon pa laga Reclasering atende cu esaki. El a exige tambe pa e droganan y e arma y e balanan wordo destrui.

ABOGADO

Mr. Illes a bisa Hues cu J.L.P. a admiti di a actua malo door di cumpra e pistool. Pa loketa e droganan, e abogado ta haya cu esaki ta bendemento masha limita. El a bisa cu Polis a scucha J.L.P. casi 5 luna y a conclui cu J.L.P. no ta un bendedor grandi di droga. E abogado a bisa Hues cu J.L.P. kier haya ayudo pa su adiccion. E abogado ta haya e castigo exige pa Fiscal na su lugar.

SENTENCIA

Hues a sera tratamento di e caso y a dicta sentencia di biaha. Hues a bisa cu droga ta un problema grandi. J.L.P. ta forma parti di e circuito di droga. Esaki ta un caso hopi serio.

Pa cu e castigo, Hues a bisa cu e ta tene cuenta cu anterior J.L.P. a wordo condena pa mesun cos y e ta bolbe haci mesun cos atrobe. Hues tambe a tene cuenta cu J.L.P. no tabata bende na grandi. Hues ta considera esaki, posesion di droga y arma di candela. Hues a tene cuenta cu J.L.P. a admiti di ta adicto na droga y ta yuda amigonan. Tambe Hues a tene cuenta cu J.L.P. kier ayudo.

Hues a bisa cu e ta desvia un poco di exigencia di Fiscal. Hues a condena J.L.P. na 26 luna di prison di cual 6 luna ta condicional cu un tempo di prueba di 3 año. Hues a ordena pa J.L.P. cay bou guia di Reclasering durante e periodo di prueba pa asina J.L.P. por rehabilita di su adiccion.

Hues a hala atencion di J.L.P. cu e ta duna J.L.P. un ultimo chens y awor den practica mester muestra cu J.L.P. ta den serio. Hues a bisa cu si J.L.P. bolbe cay pa droga, e ora ey por spera castigo pisa.

Parlamentario Dangui Oduber: **SINDICATONAN TA PIDI PARLAMENTO PA PONE UN STOP NA E RIJKSWET HOFA!**

Sindicatonan a manda un carta dia 7 di mei 2026 pa Parlamento, caminda nan ta splica un biaha mas nan posicion y ta pidi Parlamento pa para e proceso di e Rijkswet Hofa.

E conseho di Raad van Advies, como e organo di consulta mas halto di nos isla, consistiendo di expertonan local cu conocimiento profundo di ley y di e structura constitucional di Aruba, riba su mes ta ofrece un base solido y cu autoridad local pa tuma decision. Ademá, mester enfatisa cu e preocupacion principal no ta exclusivamente di naturaleza tecnico-huridico, pero den su esencia esaki ta mishi cu e structura fundamental di nos democracia parlamentario y e grado den cual Parlamento di Aruba, como e organo representativo di pueblo, por eherce su funcion constitucional. Consecuentemente, Parlamento di Aruba no por, ni tampoco mester limita su mes na warda riba un conseho adicional externo, pero mester orienta su mes riba duna direccion propio na e trayecto constitucional. Den e contexto aki, sindicatonan ta desea di haya sa for di Parlamento di Aruba si e contenido

di e conseho di Raad van Advies ta motibo pa reconsidera y cancela e proceso di e Ley di Consenso di Reino HOFA den su forma actual.

Aruba NO kier un rijkswet!

Actualmente den Parlamento, 10 di e 21 parlamentarionan ta contra e Rijkswet; banda di esaki, 13 sindicato cu ta representa miles di miembro tambe ta contra, y mas di 12.000 persona a firma e peticion contra e Rijkswet. E ta obvio cu NOS NO POR PAPIA CU TIN CONSENSUS! Gobierno no kier respecta e deseo di pueblo y, pa un 'sakito di placa' di 7.5 milyon florin, nan ta bay destrui nos Status Aparte. Con Gobierno kier pa nos celebra 40 año di Status Aparte, si despues di e cuater decadanan aki nan mes ta kita esaki for di nos pueblo? Esaki ta TRAICION!

CAFT a caba di duna su conseho riba presupuesto 2026. Den e conseho, CAFT ta señala cu e debe di pais Aruba (e debt-to-GDP) ta baha bou di 50% y lo yega na 47% na año 2028. Desde inicio, ora a cuminsa e discusion riba e Rijkswet, e condicion di Gobierno di Hulanda



tabata cu, pa tin finansa sostenibel y duradero, e debe di pais Aruba lo mester ta bou di 50%. Wel, Aruba a demostra cu nos mes por, y ya aki dos año nos debe ta baha bou di e 50% aki.

E ora ey, naturalmente, nos mester puntra nos mes: kico ta e urgencia y e necesidad pa entrega nos autonomia financiero, si nos a demostra caba cu nos mes por?

Ta insolito pa pensa cu tin politiconan Arubiano, manera Gerlien Croes, Geoffrey Wever y Mike Eman, cu kier pa nos celebra cu nos ta biba den

un pais liber, mientrastanto nan kier entrega nos libertad y bende nos pais pa un 'sakito di placa'. Ta mas insolito ainda pa pensa cu nan kier entrega nos finansa publico y nos autonomia financiero, siendo cu aki dos año caba nos debe di pais lo baha bou di 50%!

Aruba tin supervision financiero caba anca den e Landsverordening Aruba Financieel Toezicht (LAft); nos ta cumpliendo cu tur e normanan, nos ta pagando nos debenan cu Hulanda y ya caba nos debe a baha substancialmente despues di e pandemia. Mirando esaki, no tin ningun

motibo valido ni ningun hustificacion pa acepta e Rijkswet Hofa.

Libertad di un pais ta algo Sagrado. Nos ta un pais liber desde año 1986 y, danki na e libertad aki, nos pais por a prospera y progresa. Nos tin e libertad pa tuma nos propio decisionnan, e libertad pa vota den nos propio Parlamento y e libertad pa maneha nos fondonan segun nos mesun deseo. Tur esaki ta wordo kita for di nos cu e Rijkswet Hofa.

E pregunta principal ta keda: Dicon Gobierno kier destrui nos Status Aparte?

KPA TA RICIBI UN COLEGA NOBO: CUERPO POLICIAL ARUBA TA YAMA BON BINI NA K9 CARLA



Santa Cruz, ARUBA:
Santa Cruz, ARUBA:
Recientemente Cuerpo Policial Aruba a ricibi un colega nobo y valioso pa Unidad di K-9. Ta trata di e cacho policial yama Carla. Carla ta un donacion di e organisacion cu ta

hiba e nomber di Irondog K9 International. Carla ta e di tres cacho cu KPA ta ricibi di e organisacion di Irondog. Esaki ta fortalece relacion di hopi aña cu Irondog tin cu Cuerpo Policial Aruba. E meta principal ta pa garantiza y eleva e seguridad di nos dushi isla.

E relacion cu Irondog K9 International ta bay mas leu cu solamente un donacion di cachonan. Den pasado a sa

di brinda sosten fundamental na Cuerpo Policial Aruba pa medio di

donacion di vest, banchi, oranan di entrenamiento tambe seminarionan importante na Merca cu nos propio agentenan tabata tin oportunidad di atende, cu ta danki na Irondog K9 International.

E entrega oficial y presentacion a tuma lugar den presencia di e CEO y fundador Charlie Nash y CFO sra. Mitzi Nash hunto cu personal di Unidad di K9 incluyendo altocomisario Ramon Arnhem.

Altocomisario na su turno a sa di expresa su gratitud na Irondog K9 International pa nan donacion y aporte pa kere den e capacidad di Unidad di K-9 di Cuerpo Policial Aruba.

K9 Carla tambe a haya varios regalo for di altocomisario Arnhem mirando cu Carla a caba di

cumpli aña. Carla a muestra su agradecimento y a keda masha contento mes.

Cuerpo Policial Aruba ta yama un bonbini na e colega nobo K9 Carla y sa cu e ta cla pa aporta na e seguridad di nos comunidad.



ARUBA BANK ORGUYOSO DI PARTICIPA COMO SPONSOR DEN ARUBA DOET 2026 NA KUNUKU ABOU



Oranjestad- 18 di mei 2026- Aruba Bank ta mira cu hopi orguyo bek riba un proyecto exitoso durante Aruba Doet 2026 □, unda un team dedica di

boluntario a uni forsa pa contribui na mehoracion di e comunidad di Kunuku Abou □□.

Durante e actividad di 16 di

mei 2026, boluntarionan di Aruba Bank a traha hunto pa duna un bida nobo na e espacio comunitario. E

Aruba Bank ta hopi agradeci na tur boluntario cu a participa y contribui cu entusiasmo y compromiso durante e proyecto. E iniciativa aki a logra haci un impacto positivo den nos comunidad.

Aruba Bank ta continua na compromete cu iniciativa comunitario cu ta fortalece Aruba y mehora e bienestar di su comunidad □□.

Clasificados



SOLODIPUEBLO@GMAIL.COM
CEL.585 9500



Durante encuentro cu Gobierno di Aruba na Den Haag

MINISTER DI RELACIONNAN EXTERIOR TOM BERENDSEN TA COMPARTI VISION DI ARUBA PA POSICIONA SU MES STRATEGICAMENTE DEN REGION



Gobierno di Aruba a reuni dialuna atardi na Den Haag cu e Minister di Relacionnan Exterior, Tom Berendsen. E encuentro tabatin como enfoca riba cooperacion den Reino, desaroyo strategico y e situacion geopolitico den

region. Durante e reunion, Prome Minister di Aruba, Mike Eman, a expresa su gradicimento p'e envolvimento y solidaridad cu Reino Hulandes a muestra durante e reciente tension den region cerca di Venezuela.

Den e reunion, e delegacionnan a papia ampliamente tocante e desaroyonan den region y e importancia di sigui monitor e situacion den Venezuela, teniendo cuenta e impacto directo cu e tin riba Aruba y e otro paisnan y isla nan den Reino. Gobierno di Hulanda a confirma cu tin contacto continuo cu representantenan diplomatico den Caracas y cu Reino ta sigui observa e situacion cuidadosamente pa proteha e interesnan comparti di Reino Hulandes.

Prome Minister Mike Eman a enfatisa cu durante e periodo di tension, Aruba a sinti claramente e apoyo di Reino. El a indica cu e momentonan aki a demonstra den practica e valor y importancia di e relacionnan constitucional den Reino, specialmente den area di relacionnan exterior y seguridad.

Segun e Prome Minister, e cooperacion durante e crisis a confirma cu Reino ta comparti responsabilidad pa estabilidad y seguridad den region.

Ademas, durante e encuentro tambe a trata diferente oportunidad strategico pa Aruba. Entre otro, a discuti e MoU's (Memorandum of Understanding) cu recientemente firma cu e partnernan internacional manera KLM, Schiphol y Wageningen University & Research (WUR). E iniciativanan aki ta enfoca riba desaroyo economico, fortalece e conexion internacional y cooperacion den area di sostenibilidad, conocimiento y innovacion. Tambe a intercambia pensamiento tocante e proyecto di EU preclearance cu por representa un paso importante den fortalece e posicion strategico di Aruba como hub internacional den region

Caribe.

Minister Tom Berendsen a expresa su interes pa bishita Aruba den futuro cercano. El a destaca cu e relacion cu e paisnan y islanan den Reino ta importante y cu ta existi gran interes den sigui fortalece cooperacion mutuo.

Gobierno di Aruba ta mira cu satisfaccion e creciente interes y envolvimento for di Hulanda den e potencial strategico di Aruba y den e vision comparti pa duna Reino un significado nobo y relevante pa futuro.

Segun Prome Minister Mike Eman, e cooperacionnan y alianzan cu ta construi actualmente ta muestra cu Reino por evoluciona no solamente como un relacion historico, sino tambe como un plataforma moderno di colaboracion, innovacion y beneficio mutuo.

Maria Kelly cu donacion di su arte visual na HOH HOSPITAL CU BUNITA COLECCION MOSAICO YAMA “BUNITA BIDA DI UN BARBULET”



Recientemente Horacio Oduber Hospital (HOH) a ricibi un coleccion di arte hopi special. Manera pone un pia den e entrada pa Area por admira awo un coleccion di arte visual di

barbulet traha cu mosaico hopi unico. E artista local Maria Kelly a dicidi di regala e obra di arte aki ya cu e ta bay muda y unda miho cu na Hospital. “Un exposicion normalmnte



tin un duracion cortico, pero aki e obra por keda permanentemente pa tur cu pasa por admira.” Obranen di arte ta un fuente continuo di inspiracion y conexcion pa tur y tambe pa esnan cu ta bishita hospital.

Arte y cuido

E coleccion mosaico ta hopi colorido y visibel for di pafo caba. “Di e forma aki, e obra ta un exposicion permanente cu bishitante, pashent, empleado y tur cu ta pasa por aprecia diariamente. Nos ta super feliz y agradecido cu Maria a pensa riba nos,” Jacco Vroegop di Hunta di Directiva ta conta. “Nos kier ta un edificio unda hende ta sinti nan mes na cas. No solamente nos ta brinda cuido di calidad,

pero nos ta purba crea tranquilidad y serenidad tambe. Nos no ta solamente trata pashent, pero tambe nos kier contribui na e bienestar mental. Arte ta crea conexcion y ta inspira. Tur hende tin nan propio gusto, pero mi ta spera cu hopi hende lo aprecia e coleccion vibrante aki. A traha riba e coleccion aki pa hopi aña y cu hopi pasenshi. E ta realmente algo special mirando e detayenan y dedicacion cu a bay den e obra di arte aki.”

Inspiracion

Maria Kelly ta conta cu su inspiracion pa traha e coleccion “Bunita bida di un barbulet” a bin for di su amor pa naturalesa y traha den cura. E ta encanta e barbulet cu ta bula di flor

pa flor, mescos parha y flornan cu ta forma parti di e tema central. E ta sigui conta cu ela sigui les di mosaico na 2015 unda su pasion pa e forma di arte aki a nace y sigui crece. Maria a dicidi pa spaar placa pa inverti den material pa e por sigui cu e hobby aki despues di su pensioen. Pa e obra aki tambe ela uza material re-uzabel.

Tambe e ta gradici su amiga y ex-empleado di HOH, Virginia Tromp, cu a yuda logra realisa e donacion di su coleccion. HOH ta gradici sra. Kelly pa e bunita gesto aki y ta enfatisa cu arte ta trece balor, conexcion y un ambiente caluroso pa tur hende y muy en especial na Hospital.



DEN REUNION CU BURGEMEESTER DI UTRECHT SHARON DIJKSMA

Prome Minister Mike Eman ta busca pa fortalece cooperacion cu Asociacion di Gemeente Hulandes

Den cuadro di su bishita di trabou na Hulanda, Prome Minister di Aruba mr. Mike Eman a realisa un encuentro dialuna merdia cu burgemeester di Utrecht, Sharon Dijkma. Durante e encuentro, a papia ampliamente tocante sostenibilidad, economia circular, reciclahe di materia prima y cooperacion regional. Burgemeester Dijkma, cu tambe ta presidente di Vereniging van Nederlandse Gemeenten (VNG), a comparti su experiencia riba con gemeente y gobernacion local por colabora mas cerca pa fortalece conocimiento, innovacion y capacidad administrativo.

Durante e combersacionnan, Prome Minister Eman a amplia riba e desaroyonan cu Aruba ta haci actualmente relaciona cu reutilisacion di area industrial di ex-refineria na San Nicolas unda ta busca pa solucion sostenibel pa proceso di sushi y reciclahe. A discuti tambe e posibilidadnan pa cooperacion entre e diferente islanan den region Caribe pa enfrenta reto comun den un forma mas eficiente y sostenibel. Un tema importante durante e encuentro tabata innovacion den reciclahe y e importancia creciente di economia circular. Burgemeester



Dijkma a señala e experiencia amplio cu tin den Hulanda, incluyendo e trabounan di NV Huisvuilcentrale (HVC), un compania Hulandes specialisa den reciclahe, proseso di desperdicio y energia sostenibel. Prome Minister Eman a expresa gran interes den e conocimiento y tecnologia cu por contribui na futuro sostenibel di Aruba y di region Caribe.

Prome Minister Eman a enfatisa cu hopi isla na mundo ta confronta e mesun reto tocante maneho di desperdicio y reciclahe. Aruba kier

move mas y mas for di modelonan tradicional entreo otro di kima sushi, y busca oportunidad pa converti sushi den energia y/of den producto nobo uzabel den nos islanan. Gobierno di Aruba ta aprecia enormemente e disponibilidad di Burgemeester Dijkma y e institucionnan Hulandes pa sigui fortalece cooperacion y intercambio di conocimiento den beneficio di un futuro mas sostenibel pa Aruba y nos islanan ruman.

Burgemeester Dijkma a expresa tambe su apoyo p'e idea di busca

solucionnan regional pa proceso y reciclahe di materia prima. Segun dje, cooperacion entre gobierno, e expertonan tecnico y sector priva ta esencial pa responde n'e retonan ambiental moderno. Sharon Dijkma no ta un persona desconoci pa Aruba, Prome Minister Mike Eman a yega di reuni cu e actual burgemeester di Utrecht tempo e tabata staatssecretaris di Hulanda pa medio ambiente y economia entre 2012 pa 2017. Den dos siman di tempo Prome Minister Mike Eman na Hulanda lo reuni cu varios

mandatario di Gabinete Jetten como tambe diferente otro instituto di importancia pa Aruba.

Clasificados

SOLODIPUEBLO@GMAIL.COM

CEL.585 9500

FCCA A PARTICIPA HUNTO CU STUDIANTENAN DI UNIVERSIDAD DI ARUBA NA ARUBA DOET

E aña aki a mehora barionan di Sero Patrishi y Cunucu Abou

E apertura di Aruba DOET 2026 e aña aki a tuma luga na e veld di futbol di Sero Patrishi. Su excelencia Gobernador sr. Alfonso Boekhoudt a haci e acto oficial di apertura den presencia di organisadonan di Aruba DOET, CEDE Aruba, docentenan y studiantenan di Universidad di Aruba, boluntarianan di Hotel St.Regis y Ritz Carlton, habitantenan di barrio di Sero Patrishi, miembronan di prensa y demas invitadonan.

Durante e ceremonia di apertura, sra. Julie Wever, director di FCCA a hiba palabra y a enfoca cu ta un honor pa FCCA forma parti di e proyecto di Aruba DOET y cu apertura ta sosode na barrio di Sero Patrishi, cu ta un di barionan di FCCA. "Locual ta haci e iniciativa aki asina bunita no ta solamente e proyectonan cu ta wordo realisa, pero e manera cu e boluntarianan ta haci esaki; "Hunto". Aruba DOET ta muestra nos cu ora hende, organisacionnan y comunidadnan uni forsa, nos ta logra cosnan bunita y importante pa nos Pais Aruba.

E sentimento di traha hunto, di yuda otro y di contribui na algo mas

grandi cu nos mes, ta locual ta duna proyecto aki su berdadero balor. Cu e iniciativa aki di Aruba DOET, FCCA ta contribui tambe na mehoracion di e "leefbaarheid" den nos barionan. "Leefbaarheid" den nos barionan, no ta solamente caminda, cas of edificio. Cu esaki nos ta referi na hende, e mucha, e adulto, e famia, cu ta forma parti di un barrio. Un barrio unda tur persona ta sinti nan mas sigur, scucha y involucra. Esaki ta un di e compromiso cu FCCA tin cu su barionan, pa crea un ambiente mas saludabel, positivo y sostenibel y fortalece e union social na bienestar di nos barionan. E aña aki a scohe e barionan di Sero Patrishi y Cunucu Abou."

E director a continua bisandocueproyectoAruba DOET en colaboracion cu Universidad di Aruba y CEDE Aruba ta muestra nos cu impacto real ta posibel ora conocimiento, compromiso social y accion practico bini hunto. Den e diferente proyectonan di barrio, nos a mira cu participacion directo di studiantenan, hunto cu colaboracion di nos institutonan local ta trece cambio grandi



den comunidad. Esaki ta demostra ora nos uni forsa -Hunto nos ta logra!-. Cu e colaboracion cu Universidad di Aruba y CEDE Aruba y Aruba DOET, nos por fortalece iniciativanan cu ta promove cohesion social den barrio, educacion, y participacion di e ciudadano. Esey ta exactamente e tipo di sinergia cu nos mester, organisacionnan cu ta combina nan forsa y nan experiencia pa logra mas

impacto den nos barionan. Finalmente e director di FCCA a yama danki na Aruba DOET, Universidad di Aruba, CEDE Aruba, habitantenan di e barionan

di Sero Patrishi y Cunucu Abou, y tur boluntario pa nan cooperacion pa haci e proyectonan di barionan di Sero Patrishi y Cunucu Abou un realidad.



DEPARTAMENTO ARUBIANA-CARIBIANA DI BIBLIOTECA NACIONAL TA INVITA COMUNIDAD NA CONVERSATORIO DEDICA

ORANJESTAD, 17 mei 2026– Biblioteca Nacional Aruba, Departamento Arubiana-Caribiana, ta invita comunidad pa participa den e proximo conversatorio “Comparti nos Herencia”, cu e biaha aki lo pone enfoka riba e legado literario y cultural di sr. Ito Tromp.

E actividad, bou e titulo ‘Duna Mi Dos Placa di Palabra’, lo crea un espacio di encuentro y reflexion tocante contribucion di Tromp na idioma, literatura y identidad cultural di Aruba. E conversatorio ta busca conecta generacionnan cu nos herencia cultural y destaca e importancia di preserva y comparti nos historia y expresionnan cultural.

E actividad lo tuma lugar riba: Diahuebs 21 di mei 2026 di 5:30 pm te 7:30 pm na Arubiana-Caribiana, Bachstraat 5.

Entrada ta gratis, pero espacio ta limita. Pa confirma presencia, interesadonan por manda un mensahe of yama na 592-6197.



Biblioteca Nacional Aruba ta anima tur persona interesa den cultura, literatura y patrimonio di Aruba pa forma parti di e anochi special aki.

**HACI PAGO DI ABONEMENT ONLINE
TA POSIBEL:**

APRECIABLE CLIENTELA, SI BO TA DESEA DI
HACI E PAGO DI ABONEMENT ONLINE,
E TA POSIBEL:

ESAKI TA NOS CUENTA:
SUNMAX PRINTERS - STA. CRUZ 110
BANCO: RBC
NUMBER DI CUENTA: 7700000100152447

**DI ANTEMANO,
MASHA DANKI.**

SOLO DI PUEBLO

**BUSCA.
DESCUBRI.
COMPARTI.**

PARLAMENTARIO JENNIFER ARENDS-REYES:

DELEGACION DI ARUBA TA PREPARANDO PA PARTICIPA DEN SIGUIENTE SESION DI IPKO



ORANJESTAD (18 di mei 2026) – Den su calidad como Presidente di e Comision di Reino y Relacionnan Exterior di Parlamento di Aruba, parlamentario Jennifer Arends-Reyes a anuncia cu un delegacion oficial di Aruba lo participa den e proximo encuentro di IPKO (Interparlementair Koninkrijksverleg), cu lo tuma lugar na Hulanda na comienso di juni. IPKO ta un plataforma

importante unda delegacionnan parlamentario di Aruba, Corsou, Sint Maarten y Hulanda ta reuni pa discuti temanan cu ta toca e futuro di e Reino Hulandes y fortalece e cooperacion entre e diferente paisnan. Durante e encuentro, delegacionnan ta intercambia idea, comparti preocupacionnan, presenta “best practices” y traha riba solucionnan comun tocante asunto di



interes general, manera sostenibilidad, economia, educacion, seguridad y relacionnan internacional. Sra. Arends-Reyes a enfatisa cu participacion di Aruba den IPKO ta esencial pa Aruba por sigui haci su voz resona y defende e interes di nos pueblo. “IPKO ta un momento importante pa Aruba pa reafirma e necesidad di un relacion basa riba respet, igualdad y cooperacion real den Reino. Aruba no ta solamente un partner; Aruba ta un pais cu su propio realidad y prioridadnan cu mester tuma na cuenta,” segun Arends-Reyes. Segun e Presidente di Comision, e delegacion Arubiano lo enfoca riba diferente tema importante, incluyendo igualdad den

Reino, implementacion di acuerdonan y reformanan cu tin impacto directo riba Aruba, y e necesidad pa un enfoque realistico den cooperacion financiero y institucional. Tambe lo hiba preocupacionnan di pueblo Arubiano riba mesa y comparti punto di bista tocante diferente asunto pa garantiza cu decisionnan cu ta tuma na nivel di Reino ta sigui refleha e interes di Aruba. Sra. Arends-Reyes agrega cu IPKO ta representa tambe un oportunidad importante pa fortalece relacionnan diplomatico cu parlamentarionan di otro paisnan den Reino y pa crea un dialogo mas directo, habri y constructivo. E delegacion lo consisti di miembronan di Parlamento di tur

fraccion, representando e prioridadnan di Aruba durante e reunionnan oficial. Actualmente e Comision di Reino y Relacionnan Exterior a reuni y ta den preparacion pa e encuentro. Ademas, ta wordo planea diferente bishita di trabou na Hulanda relaciona cu, entre otro, studiantenan Arubiano na Hulanda y contacto cu diferente instancia diplomatico y Europeo, cu apoyo di nos Minister Plenipotenciario y Kabinet di Aruba. Parlamentario Jennifer Arends-Reyes a conclui indicando cu Parlamento ta mira participacion den IPKO como un paso importante pa fortalece e rol di Aruba den Reino y pa sigui lucha pa un futuro mas stabiel, husto y sostenibel pa nos pais.

COMISARIO DI POLIS SRA. IRMA GORDON

HENDE MUHER TAMBE POR KERE

DEN BO MES, NADA NO TA IMPOSIBEL!

Santa Cruz, ARUBA: Cuerpo Policial Aruba den cuadro di nos 40 aniversario ta sigui cu nos seccion historico,

informativo y educativo yama "E porta blauw episodio: E bida di un Polis". Nos ta para keto un rato y conoce

Sra. Irma Gordon, comisario di Cuerpo Policial Aruba.

Episodio 3: Naci na Oranjestad, Aruba, sra. Irma Gordon un hobencita simpatica cu un carisma sin igual cu

mester a scohe kico ta su soño desde hoben cu a hib'e awe ta un comisario femenino, un hende muher den un

funcion di mas importante den un organisacion policial di un Pais. E no a bay facil pero awe e ta conta

comunidad su esfuerso, tempo y dedicacion pa yega na e funcion te cu awo.

Aplica na aña 1982: Sra. Gordon su deseo semper tabata ta pa bira polis, maske e tabata tin opcion pa studia pa

un dokter, abogado of polis. For di aña 1982 cu e tabata studia na MAO, sra. Gordon a purba y a aplica pero e

resultado tabata envano y no a logra drenta.

Tempo na Hulanda: Na aña 1986 sra. Gordon a bay Hulanda pa sigui studia y desaroya. For di inicio sra. Gordon a traha na ministerio di finansa di

Duana pa opleiding di duana e tempo ey. Na Hulanda e la mira cu a habri vacatura na Hulanda pa opleiding di polis pasobra e deseo semper tabata pa bira polis. Tabata na aña 1990

despues di a mira e vacatura y purba atrobe, sra. Gordon a pasa e pruebanan cu exito y asina e inicio di su carrera policial a inicia na Den Haag, Hulanda.

For di oktober te cu december 1990, sra.

Gordon mester a pasa diferente testnan, manera Hulandes con pa lesa y scirbi y diferente otro testnan. Despues cu a haci tur esaki sra. Gordon a logra drenta opleiding di polis

oficialmente ariba 1 januari 1991. Na cuminsamento e idioma Hulandes tabata un desafio grandi, pero sra.

Gordon tabata tin un meta y un plan pa logra caba e opleiding cu exito pasobra e tabata determina pa haci esaki.

Na oktober 1992 trabou duro a duna su fruto y a termina e opleiding di polis cu diploma den su man.

Despues di a logra su diploma sra. Gordon a bay traha na wijkteam na Amsterdam, maske e tabata biba na Den

Haag e la logra cambia esaki y tabata mas cerca di su famia cu tabata biba na Amsterdam e tempo ey.

Prome experiencia impactante: 4 oktober



1992 e trabou di polis uniform den Amsterdam a cuminsa. Sra.

Gordon a conoce e bario e hendenan y a desafionan. Den e prome dianan a resulta como un prueba di mas

grandi den e trabou di sra. Gordon cu e caida di e avion di carga Boeing 747 di EL AL. E dicho avion a cay den

un apartamento complex den Bijlmer na Amsterdam. E momento ey sra. Gordon tabata trahando como polis na civil. E la haya e melding cu tur unidad na Hulanda cu ta Polis of na civil pa acudi cu emergencia na Bijlmer. Bou zwaailicht y sirena sra. Gordon hunto cu su klas mester a brinda seguridad den e bario di Bijlmer.

Na yegada sra. Gordon a mira e situacion cu nunca mas e por a lubida. Trahando como civil y algun dia trahando a

biba e scenario horroroso y tristo cu e caida di e avion. Maske sra. Gordon tabata mester a proteha e sitio di e desaster ela biba e emocion di cerca. Un candela grandi di dos piso cu tabata asina cayente cu maske con leu bo ta, bo ta sintie. Sra. Gordon tabata leu y tabata sinti e cayente fuerte dal'e den su lomba y mester a sigui traha. Sra. Gordon nunca mas ta bay lubida con un candela tabata yora... un yora cu pa semper ela keda corda. Un situacion difil cu a impacta sra. Gordon basta fuerte te cu awe.

Desaroyo na Hulanda:

Despues di a sigui haci e trabou di polis, sra. Gordon a sigui desaroya su mes den varios projectonan, cursonan tambe participacion den comisionnan. Den e wijkteam mes sra. Gordon a atende school-adoptie cu tabata tin inclui varios scol aden. Sra. Gordon a atende

mas tanto e zmo school pa e ta mas cerca di hobennan cu di mester mas atencion. Tambe e tabata den jeugbegeleiding, kern instructor di x-pol na Hulanda y participacion den volleybal na Hulanda tabata sigur un atencencia pa sra. Gordon mirando cu for di chikito e tabata haci esaki. Apesar di tur esaki sra. Gordon tabata determina pa yega leu den e carrera di Polis.

E yamada pa bay bek:

Despues di 15 aña, e sintimentonan y gana di bolbe Aruba a yega.

Aplicacion y desaroyo na Cuerpo Policial Aruba:

Na aña 1998 sra. Gordon a bolbe bek Aruba, a aplica pa un estudio policial na Cuerpo Policial Aruba pa bay NPA na februari di e mesun aña. E tempo ey sra. Gordon y mr. Molina a haci e pruebanan hunto pa e opleiding aki cu sigur no tabata facil. Sra. Gordon mester a atende

HENDE MUHER TAMBE POR KERE DEN BO MES, NADA NO TA IMPOSIBEL!



un selectiegesprek cu varios persona importante na mesa manera: Altocomisario Nectar, mr. Bernadina, mr. Van der Straten, Procurador General, y Jeugdoffi cier. Bou guia di Mr. Martes cu tabata e referencia di sra. Gordon. Na April di e mesun aña sra. Gordon a haya un mensahe di mr. Martes cu ela logra pa drenta e opleiding na NPA. Sra. Gordon a drenta e opleiding ariba 1 augustus 1998 y a dura 3 aña pa motibo cu sra. Gordon tabata polis caba na Hulanda.

Carera Policial na Aruba:
Despues cu a termina cu su estudio na NPA na Hulanda cu exito na aña 2001, Sra. Gordon a bolbe bek Aruba y a cuminsa traha den luna di augustus di aña 2001. Sra. Gordon a cuminsa como coordinador di ploeg na districto di Oranjestad. Na januari di aña 2002, sra. Gordon a bay traha na districto di San Nicolas den e mesun funcion.

Pa motibo di su profesionalismo policial e tempo ey Van der Straten a acerca sra. Gordon pa forma parti di un team di

Cero Tolerancia pa motibo di hopi problema den e hotzone di Oranjestad. Cu e curashi y determinacion a lanta e team pa re-establece orden publico bek den Oranjestad. Un proyecto cu a resulta exitoso.

Despues e trayectoria policial no a caba y a sigui desaroyo. Sra. Gordon a aplica na aña 2005 pa hefe di Scol di Polis E.J. Watty Vos na unda cu tambe ela logra esaki cu exito te cu aña 2009. Na 2009 sra. Gordon a aplica como hefe di districto di San Nicolas y a logra esaki cu exito. Na aña 2012 sra. Gordon no ta para keto y tabata determina pa mas y a aplica pa comisario di Polis na unda tambe ela logra esaki. Sra. Gordon a bira comisario di Polis di bijzondere diensten di KPA. Band'i esaki tambe ela forma parti di diferente comisionnan importante manera: Directie Scheepvaart, problema di frontera cu Venezuela. Tambe un tempo a dirigi e polis uniforma como tambe Guarda Nos Costa cu a cay bou di e cartera di Sra. Gordon. Na ultimo tambe ela haci e funcion di altocomisario interino di KPA. Sra. Gordon ta sintie hopi honra, cu hopi placer y ta orguyoso cu e ta un of e unico hende muher cu a pasa for di abou yega te na e funcion halto como hende muher den un organisacion cu ta mas pa hende homber.

Hende muher den funcion halto : Orguyoso di a haya e oportunidad di a yega asina leu den KPA, pa haci su carera cu maske ta wordo domina pa hende homber pero a logra su meta, tabata palabranan di sra. Gordon.

Hende muher tambe por : Como hende muher abo mester tin bo norma y balor. E ta conta tambe pa hende homber. Bo mester tin bo soño y bay pe. Logra esaki den tanto tempo! Lo tin hopi obstaculo pero para fuerte den bo sapatonan. Nada no ta imposibel. Mi a cuminsa di abou y wak awo unda mi ta awe. NO laga niun hende bisa abo cu nunca bo no por. Ta depende na abo mes y bo esfuerso cu abo pone den dje.

Trayectoria di comisario: Sra. Gordon a experiencia hopi temanan riba nivel halto como comisario. Sra. Gordon a representa Aruba den ACCP, Internacional Association of Women Police, JVO overleg, como altocomisario interino y combersacion cu Gobernador como altocomisario Interino. Tur ministernan tambe sra. Gordon a combersa cu nan pa pone nan na altura di diferente temanan di pais Aruba. Alabez a dirigi SGBOPa 15 aña cu ta atende cu casonan di calamidad, eleccion pa parlamento, demonstracion of bishita di personan importante di nivel halto na Aruba.

Ken ta señora Gordon?: “Ami ta un hende down to earth, no paso ami tin un funcion halto mi ta bay pafo muestra mi strepinan halto. Mi ta keda mi mes,

ora cu mi mester treed op mi ta hacie, mi no tin miedo di habri mi boca pero mi ta hacie cu respet” tabata palabranan di sra. Gordon. Bida despues di e porta blauw:

Despues di labora sra. Gordon ta dedica tempo na locual e gusta mas. Un di e temponan mas dushi pa sra. Gordon ta carnaval. E tin paña di carnaval pa decora, head piece pa decora etc...Tur aña sra. Gordon ta dedica tempo na carnaval. Alabez e gusta hunga domino, hopi hende no a logra gana sra. Gordon den domino. Tambe sra. Gordon ta umpire pa little league. Asina den su tempo liber e ta dedica su mes haciendo loke mas e ta gusta.

Balor di famia:
Balor di famia ta hopi grandi. Ora cabes ta yen eynan mi ta bay sinta combersa. E ta hopi importante pa sra. Gordon tin su famia band'i dje. Sra. Gordon tin un yiu homber cu awor ta tata. Y sra. Gordon ta dedica tempo na su nieto. Si bo por pasa tempo y dedica na bo famia. Na fi nal di dia ora cos bay malo ta serca bo famia bo ta bay.

Conseho na nos agente policialnan:
Nos tur ta ser humano, nos ta pasa den nos cosnan pero purba semper keda cu respet y sea humilde. Nos a haya les pa purba keda trankilo y cariñoso semper. Di e manera ey bo por yega leu den bo bida y carera.

Mensahe na nos comunidad:
Trabou di polis no ta facil. Tur aña ta bin cosnan nobo, ideanan nobo, pensamiento di hende. Como polis tur e cambionan aki tampoco no ta facil. Nos mester cambia semper nos manera di treed op, manera di papia tambe. Ban sigui traha hunto pasobra nos mester di otro.



Mensahe na nos comunidad:
Trabou di polis no ta facil. Tur aña ta bin cosnan nobo, ideanan nobo, pensamiento di hende. Como polis tur e cambionan aki tampoco no ta facil. Nos mester cambia semper nos manera di treed op, manera di papia tambe. Ban sigui traha hunto pasobra nos mester di otro.

FORTALEZA PA FAMIA

Scirbi pa Pastor Marcel Balootje.

NA UNDA NOS DECENCIA TA BAYENDO?

Dios a traha nos tur den Su imagen y Su semehansa, pa nos por ta yuinan di Dios y yuinan di lus, pa Su Spirito Santo por governa nos bida, na e momento cu nos acepta Cristo Hesus como nos Senjor y Salvador.

Nos no ta yama pa cana den scuridad, y haci cosnan cu no ta den boluntad di Dios, pasobra e lus di Dios ta governa nos bida.

Ta di berdad cu nos ta biba den tempo trabahoso, e palabra di Dios ta mostra nos esey den 2 Timoteo 3 : 1-5, y esun cu no kier kere, awor e por mira, pasobra ningun hende por tapa solo cu un dede.

Ta berdad cu e binida di nos Senjor Hesus Cristo ta serca, pronto e lo bin busca Su pueblo, cual ta esnan cu ta biba pa E, y cu e speransa di bay cun'E.

Pero encuanto nos decensia ta un dolor hopi fuerte:

No tin respet pa hende ni pa bida di hende.

Amor matrimonial y familiar a fria.

No tin respet entre esposa y esposo y entre mayor y yiu.

Adulterio ta kibrando hopi matrimonio.

Sensualidad ta causando hopi pleito.

Hende ta papia malo di otro, y

ta parce manera kibra otro ta un delicia.

Bistimento perverso a bira un arte, y ta cay den categoria sexy.

Pidi dispensa, para den rij warda bo beurt, bisa bon dia ora bo drenta un lugar a bay for di moda.

Ta poco hende ta tene cuenta cu palabra malo (sushi) no ta parti di nos vocabulario.

Ta parce manera mas violento un hende ta , mas great e persona ta.

Ta parce manera mas nos bebe, parandia, y droga mas largo nos bida lo ta.

Ta parce manera mas muher un homber casa por tin mas homber e ta.


Ta parce manera un muher casa cu tin mas homber ta un muher balente.

Hopi hende ta keda keto pa no perde amistad, pero nos no ta yama pa consenti cu maldad.

Si bo sa cu un hende ta haci cos robes, bo tin cu bise den su cara cu sinceridad, cu e ta robes.

No wak si e ta duna bo placa, ni tampoco cuminda,pero bise su berdad pa salba su alma.

Coregi bo yiu , aunke e rabia, no lage biba con cu ta, y evita berguensa den henter famia.



No bay tras di sistema moderno di mundo, pero renoba bo mente, y haci e boluntad di Dios.

No ta pasobra mundo ta bayendo atras den decensia y respet nos tin cu forma parti di e bagamunderia.

Laga nos comporta nos mes decentemente manera den dia,no den parandiamiento,y den buracheria,no den inmoralidad sexual, den sensualidad,no den pleito,y envidia. Ma bisti boso mes cu Senjor Hesus Cristo, y no haci provision pa e carni, pa cumpli cu su mal deseonan.(Romanonan 13:13-14).

No laga nos lubida cu tin consecuencia pa tur esnan cu no ta hanja necesario pa reconoce Dios cual ta para scirbi den Romanonan

1:28-32.

Laga nos tur tene na cuenta locual ta para scirbi den Juan 3:16 y locual tin para scirbi den Juan 3:36.

Ta tempo pa nos tur realisa cu locual tin para scirbi den Galationan 6 :7-8 ta conta pa tur hende, pasobra ningun hende no por ganja Dios, y dilanti di Dios tur cos ta habri y ningun hende tin bida priva , pasobra Dios ta mira tur cos.

Ta para scirbi den 1 Juan 1:9: Si nos confesa nos pica E ta fiel y husto pa pordona nos pica y libra nos for di tur inhusticia.

Sinceramente, Pastor Marcel Balootje.